

**INTERVENSAUN POLITIKA BANKADA PARTIDO CNRT NIAN, IHA ÂMBITU RE-APRESIASAUN BA VETO POLITIKO BA OJE 2016, HUSI SUA EXCELÊNCIA,...**

**Bankada Cnrt-Friday, January 8, 2016**

Senhor Presidente do Parlamento Nacional, Dr. Vicente Guterres  
Senhores Vice-Presidentes do Parlamento Nacional  
Senhor Primeiro-Ministro, Dr. Rui Maria de Araújo  
Caros Colegas, Distintos Deputados  
Senhores Membros do VI Governo Constitucional  
Rona-na'in, husi Sociedade Sivil no Povo tomak

Antes halo apresiasaun política, iha biban ida ne'e, Bankada CNRT hakarak hato'o nia dezejus ba kontinuasaun Boas Festas Santo Natal nian no husu boot Tinan Foun ida kmanek ba povo doben Timor-Leste tomak, no ba ita hotu iha Magna Casa de Democracia ida ne'e.

Hodi Bankada nia naran, ha'u agradece oportunidade atu hato'o Partido CNRT nia hanoin kona-ba desizaun Presidente da República hodi hasai VETO ba Orsamentu Jeral Estado nian, ba tinan 2016.

Iha tinan Sanulu resin Tolu nia laran, iha Lejislatura tolu ona, ita hotu hatene katak Orsamentu Jeral do Estado maka sai hanesan ran nebé fó moris ba isin lolon tomak – isin lolon ne'e maka: Estado no Nasaun!

Iha Lejislatura rua ho balun nia laran, Parlamentu ida ne'e aprova Orsamentu barak, tuir prazu nebé ita-nia sistema haruka; nuné mós, Parlamentu Nasional aprova orsamentus retifikativus lubuk ida; akontese mós katak Parlamentu Nasional aprova Orsamentu iha mós fulan Janeiro nia laran ona, tamba sirkunstansias oi-oin, maibé experiênsia hatudu katak bain-hira orsamentu sai tarde, afeta tebetebes ezekusaun programas governu nian, hodi hala'o desenvolvimentu ba ita-nia Rai doben, Timor-Leste.

Iha ita-nia istoria badak, nudar Estado, foin, pela primeira vez, maka Prezidente da República veta Orsamentu Jeral Estado.

Bazeia ba artigu 92º. Konstituisaun RDTL, katak, 'Parlamentu Nasional mak Órgaun Soberania República Timor-Leste nian, nebé representa ema Timor-oan tomak, iha kbiit atu halo lei, atu fiscaliza no atu halo desizaun política'.

Iha mós artigu 95º. Konstituisaun da República fo knar, hanesan tuir mai né, ba Parlamentu Nasional: -"delibera kona-ba relatoriu actividades Governu nian; - delibera kona-ba Planu no Orsamentu Estado nian, nas mós relatóriu kona-ba orsamentu ne'e; - fiskaliza oinsá Estado hala'o, ka ezekuta, orsamentu nacional".

Maibé, ha'u hakarak bolu atensaun ba rona-na'in sira, katak, wain-hira Parlamentu Nasional hala'o nia knar sira nebé temi iha leten, Parlamentu Nasional obedese nafatin ba prinsípiu separasaun de poderes no interdependensia entre órgauns soberanus sira.

Senhor Presidente do Parlamento Nacional  
Senhor Primeiro-Ministro  
Distintos Deputados  
Membros do VI Governo Constitucional  
Rona-na'in, iha Timor-Leste tomak

Lós duni katak VETO, prerrogativa ida husi Presidente da República. Konstituisaun da República klaru iha nia artigu 88º., katak "Prezidente da República...ezerseniadireituatu veta, hodi husu (ba Parlamentu) atu halo fila fali apresiasaunba diploma né, ho mensagem nebé fundamentada".

Agora, Excelências sira permite ha'u atu halo análise ba 'fundamentus' ka 'razoens' nebé Presidente da República hato'o mai Parlamento.

1 – Presidente da República hakerek nune'e: 'Tenho alertado que o investimento actual não se pode fazer a expensas do desenvolvimento futuro'. Ho tetun, katak: 'Ha'u alerta ona kona-ba investimentu, nebé halo daudauk né, labele tau em risku dezenvolvimento aban-bainrua nian'.

Bankada CNRT hakarak fo hatene ba públiku, ba povo tomak, katak Parlamento Nasional nunka simu alerta ida ne'e, no bankada CNRT la konkorda simu mensagem liu husi jornais, tamba Konstituisaun dehan, iha artigo 86º., 'Presidente da República nia kompetensia kona-ba orgauns sira seluk', katak: 'Dirije ka haruka mensajem ba Parlamento Nasional...' Bankada CNRT temi ida ne'e, atu hatudu deit katak Parlamentu Nasional labele simu mensajem husi Presidente, liu husi jornais.

Maibé, rona no lê tuir sa-ida mak mosu iha imprensa, Bankada CNRT la consegue lembra alerta ho hanoin nebé hakerek iha leten: 'o investimento actual não se pode fazer a expensas do desenvolvimento futuro'.

2 – Bankada CNRT la konkorda ho fundamentus nebé Presidente da República hato'o, tamba:

1º. – Presidente, ka Presidente nia assessores sira, la akompaña prosesu diskusaun orsamentu, desde audiencias husi Komisoens hotu-hotu, to'o diskusaun iha Plenária, ba

Jeneralidade, liu fali husi Komisaun Eventual to'o mai diskusaun iha Plenária, ba Especialidade.

Ha'u dehan 'la akompaña', tamba buat sira nebé Prezidente foti, Deputadus sira foti tiha ona. Prezidente da República nia mensagem ne'e hatudu buat ida: - hakarak dehan fali katak Deputadus Nenulu resin Lima, iha Uma Fukun ida ne'e, la halo tuir sira-nia knar, la iha preokupasaun ba povo nia moris, la preokupa ho oin-sá Governu jere no gasta osan Estadu nian, la husu responsabilidade ba Governu kona-ba ezekusaun orsamental no implementasaun Governu nia programas, husi Planus de Asaun Anual nebé, tinan-tinan mai apresenta iha ne'e.

Assessores Prezidente da República nian hanesan fali hakarak hatudu katak, la iha ona Ema ida mak preokupa ho dezenvolvementu Rai ida ne'e nian no ho Povo nia moris.

At liu, mak ne'e:

Prezidente da República temi nune'e: husi Presidência da República, tamba folin minaria tun, sira hatún liu 1 milhaun de dólares ba 2016. Afirmasaun ida ne'e LA LÓS!

Assessores sira mak ba lohi Prezidente da República.

Envelope fiskal, nebé Governu fó ba Prezidente da República, maka: \$5 milhoens, 535 mil. Maibé, iha submissaun orijinal, Presidência da República husu \$8 milhoens, 316 mil!

Komitê de Revizaun Orsamentu, depois de hasai tiha \$ 450 mil ba CAVR, nebé passa ona ba Primeiro-Ministro, maka hatún,

husi \$8 milhoens, 316 mil dólares né, ba \$6 milhoens, 800 mil!

Bankada CNRT fo hanoin deit katak, karik, husi Orgaun de Soberania ida ne'e maka tuir nia envelope fiskal, ita bele hanoin katak instituisoens Estadu nian tomak sei haktuir, no Texto ba Orsamentu \$1.3 bilioens bele hetan!

Ezersisiu né hotu, tamba haré ba despezas husi Prezidente da República, nudar ezemplu ida, ba deit 20 de Maio iha Maliana, Presidência da República gasta kedas \$75.000,00 dólares (itabeleba visita Portal Transparensia Governu Timor-Leste).

Buat ida tan, mak ha'u hakarak fo sai maka ne'e: Assessores Prezidente da República nian hakarak kompara fali órgaun Presidência da República ho Ministerios sira, ho Governu tomak, hodi hatudu sira-nia ignorânsia ba Planus de Asaun Anual husi Ministerius ida-idak. Assessores sira mos hatudu katak, sira la iha liu ideia kona-ba prosessu 'konstrusaun Estadu' no 'konstrusaun Nasaun', nebé la'o daudauk, ho FOIN tinan sanulu resin tolu.

Ekonomistas sira iha Presidênsia da Repúblika, lolós, ba servisu iha Uniaun Europeia, nebé hetan problemas finanseirus no sócio-ekonomikus boot tebe-tebes. Assesores sira né mak la hatene katak FMI no Banku Mundial prezisa hela ekonomistas ho matenek hanesan sira, atu ajuda resolve problemas iha Europa.

Senhor Presidente do Parlamento  
Senhor Primeiro-Ministro  
Distintos Deputados  
Senhores Membros do Governo  
Rona-na'in sira, husi Sociedade Sivil no povu tomak.

Prezidente da Repúblika, foin tinan rua ho balun iha Aitarak Laran, hatudu katak la akompañã diskusoens kona-ba Fundo Petroleo, iha Lejislativas ulu-uluk, hodi ko'alia kona-ba Levantamentu liu Rendimentu Sustentavel Estimadu.

Ekonomistas sira, iha Presidênsia da Repúblika, hakerek hanesan ne'e: 'Num OGE em que: a) a despesa corrente do Estado corresponde a mais de dois terços da despesa total e em que, b) cerca de metade (47%) do financiamento global do Orçamento é feito acima do RSE, significa que o mecanismo de levantamentos acima do RSE não se destina a salvaguardar os interesses futuros de Timor-Leste e dos timorenses, mas a financiar o funcionamento actual da máquina do Estado'.

Ho tetun, katak: 'Iha OJE nebé: a) despesa korrente Estadu nian liu fali dois tersus despesa total nian, no iha nebé b) besik metade finansiamto ba Orsamentu nian, mai husi hasai liu RSE (Rendimentu Sustentável Estimadu), ne'e katak mekanismu halo levantamentu liu tiha RSE ne'e, la proteje ona intereses Timor-Leste no timoroan sira nian iha futuro, maibé atu finansia funsionamentu ba mákina Estadu nian agora daudauk'.

Karik Assesores sira seidauk hetan ideia kona-ba Livros ka kadernus sira nebé, tinan-tinan, Governu fó sai, hodi diskrimina despezas sira no sira nia alokasaun ba programas iha distritos to'o suku. Tamba ne'e, mak assesores sira né ko'alia kona-ba 'finansia mákina do Estadu', hanesan fali Osan tomak husi Orsamentu Jeral do Estadu atu selu deit ema, selu deit mina no per-diem ba distritos no suku.

Ha'u kompreende katak Prezidente da Repúblika, antes de sa'e ba Prezidente, la akompañã prosesu tomak, iha II Lejislativa, tamba ne'e la rona katak iha Uma Fukun ida ne'e, sai deklarasaun ida husi ex-Primeiru Ministru IV Governu nian, katak nia prefere 'hatún osan atu kria kondisoens ba investimentu privadu estranjeiru, hodi kria empregu, du-ke rai osan iha Banku ho ita-nia Povu moris kiak'. Atu reduz pobreza, la os prosesu tinan lima nian, prosesu ida ke naruk!

Ba Timor-Leste, assesores iha Presidênsia da Repúblika, sira hakarak halo milagre!

Senhor Presidente do Parlamento Nacional  
Senhor Primeiro-Ministro  
Distintos Deputados  
Senhores Membros do Governo  
Rona-na'in sira no povu tomak

Prezidente da Repúblika dehan katak Nia alerta, durante diskusaun Orsamentu ba nesesidade atu define diak liu prioridades nasionais, hodi bele investe ita nia rekursus nebé limitadu tebes.

Prezidente da Repúblika temi katak, tenki tau osan barak liu ba edukasaun, ba saúde, ba bé no saneamentu no ba agrikultura, hodi nuné bele hetan ekilibriu iha investimentu ba 'sasán' no ba 'ema'.

Prezidente da Repúblika hatudu katak Nia mesak bele haré luan liu ema barak iha Parlamentu no iha Governu.

Prezidente da República mos temi kona-ba 'infraestruturas' no 'ZEEsM', hodi hatudu deit katak la komprende Plano Estratejiku Dezenvolvimentu, nebé hatudu katak infraestruturas básicas, maka sai kondisaun fundamental ba dezenvolvimentu ekonómiku no sosial.

Dehan katak ZEEsM la fo garantia ba retorno! Dehan mos katak Tasi Mane la konsidera katak Bayu Undan maran daudauk ona, no katak seidauk iha planu atu dezenvolve Greater Sunrise. Bankada CNRT hakru'uk ba Ekonomistas sira iha Prezidência da República – sira hatudu hanoin luan, hanoin naruk, nebé sira seidauk iha duni!

Ho ZEEsM no TASI MANE no INFRASTRUTURA, né hotu, mak Prezidente da República dehan mós katak iha Rejiaun Asia no Pasífiku, Timor-Leste mak investe menus liu iha edukasaun no saúde. Bele! Organizasoens internasionais sira kostuma servisu deit ho estatistikas hanesan ne'e! Ne'e hatudu katak assessores, nebé servisu iha Prezidência da República, koñese diak tebe-tebes Asia no Pasífiku.

Estados Unidos da América rasik foin daudauk, bain-hira ita diskute OJE, iha Plenária, iha Dezembro tinan kotuk, fó sai sira nia estatistika katak, sira iha 41 milhoens de pobres, nebéla iha uma, la iha hahán, la iha osan no la hetan assisténsia saúde. Sira fó sai mós katak, iha América, 15 milhoens de kriansas la bá eskola. Iha fali Portugal, RDP fó sai katak, 30% husi populasaun, agora, iha hela pobreza extrema nia laran. Escolas balun taka, Universidades barak la iha osan atu hala'o actividades bara-barak; Hospitais sira mós iha problemas oi-oin deit!

Timor-Leste foin tinan sanulu resin tolu!

Edukasaun ho saúde, áreas rua nebé, enkuantu Timor-Leste la nabén, sei continua nudar sectores nebé Estadu sei tau matan beibeik... no nafatin; né katak, setores rua nebé tenki sai preokupasaun husi jersaun ba jersaun!

Senhor Presidente do Parlamento Nacional  
Senhor Primeiro-Ministro  
Distintos Deputados  
Senhores Membros do Governo

Maluk rona-na'in sira, husi Sosiedade Sivil no povu tomak

Prezidente da República hateten katak, depois de Ukun-an Tinan Sanulu Resin Tolu ona, la iha resultados signifíkativus husi investimentu públiku. Dehan mós katak 'konsensu nasional' la serve bain-hira 'melhoria kondisoens moris timoroan hotu-hotu nian la mosu' kedas.

Nudar Partidu nebé iha responsabilidade iha Governu tolu nia laran, CNRT hakarak hatete deit katak, husi kedas krize 2006, mak Partidu ida ne'e buka hatudu dalan nebé lós ba Povo, hodi sai, ohin loron, Partido ho asetus barak liu iha Parlamentu. PED (Planu Estratéjiku Dezenvolvimentu), nebé Parlamentu Nasional aprova iha 2011, hatudu ona dalan atu hadi'a povo nia moris no nasaun nia progressu, to'o 2030.

La iha dalan seluk, la iha dalan badak, la iha milagre, iha kontektu konstrusaun Estadu no konstrusaun Nasaun. Assessores matenek sira, iha Prezidência da República, lalika hanoin atu mai hanorin Parlamentu ho Governu hodi hala'o sira nia knar.

Iha funu laran, mak assessors iha karik, ohin loron ita seidauk ukun-an! Iha 1999, bain-hira Nasoens Unidas hasai planu atu resolve Funu iha ita-nia Rain, ONU halo tuir deit sa-ida mak hasai tiha ona iha Planu de Paz 1983, nebé CRRN apresenta ba Indonesia, iha período sesar-fogo. Lolós kedas! Maibé... ita tenki hein tinan Sanulu resin Tolu!

Atu dezenvolve ita-nia rain, ita iha ona Vizaun ba 2030! Rai barak, iha mundu, seidauk iha Vizaun hanesan né!

Ne'e, maka ita bolu 'konsensu nasional'! Konsensu nasional la implika rona ema hotu-hotu ka ema ida-idak, atu hasai desizoens! Iha Parlamentu Nasional iha Representantes Povu nian, lejitimamente eleitus, ho sira-nia knar tuir Konstituisaun da República!

Orgauns soberania ida-idak mak tenki hatene ninia knar rasik, iha prosesu jere dezenvolvimentu ne'e-katak jere halerik povu nian, jere mehi povu nian ho jere dalan atu responde ba halerik no mehi sira ne!

Ita lalika temi 'konsensu nasional', ita lolós temi 'bom senso polítiko' husi líderes tomak Nasaun nian.

Senhor Presidente do Parlamento Nacional  
Senhor Primeiro-Ministro  
Distintos Deputados  
Senhores Membros do Governo  
Rona-na'in sira hotu

Prezidente da República mós hatete katak Nia Veto tamba kria fali 'Fundu de Infraestruturas' foun, hodi dehan katak kriasaun Fundu foun né la tuir kuadru legal, nebé define regras de funcionamentu, nebé transparente, ba fundus especiais.

Prezidente da República dehan mós katak Nia la iha informasaun kona-ba Fundu Foun ne'e. Karik Prezidente da República bolu Prezidente do Parlamento ka Primeiro-Ministro, ita hotu hein katak Sua Excelencia Prezidente da República sei kompreende katak la ós Fundu foun ida.

Mós sei kompreende tan-sá maka transforma Fundu de Infraestrutura ba Fundo Autonomo, ho ninia implikasaun sa-ida. Tuir Bankada CNRT nia haree, Lei do Orsamentu mos bele konsidera hanesan lei de valor reforçado, hanesan Lei do Orsamentu e da Gestão Financeira. Tamba transformasaun ida ne'e, konsidera jestaun financeira, husi osan iha OGE.

Assessores Presidente da República hakerek hanesan ne'e: 'As regras da Lei do Orçamento e da Gestão Financeira visam garantir o transparente funcionamento dos fundos especiais... que a simples previsão legal no OGE não garante'.

Ho tetun, katak: 'Regras nebé mai husi Lei Orsamentu no Jestaun Financeira nian buka garante funcionamento nebé transparente ba fundus especiais... buat nebé sei la akontese ho deit previzaun legal husi OJE'.

Bankada CNRT hakarak dehan katak Lei do Orçamento no Lei do Orçamento e da Gestão Financeira, lei rua né, iha valor normativo hanesan. Tan ne'e, klaru tebes katak Governu sei hamosu Decreto-Lei hodi define ho klareza liu funcionamentu Fundo Autónomo ne'e. Decreto-Lei la ós Resolução do Governo; Decreto-Lei sei ba promulgasaun husi Presidente da República. Karik Resolusaun simples husi Governu, maka ita bele ko'alia kona-ba ninia 'dignidade', tuir liafuan nebé Prezidente da República hasai iha páginas 5, iha ponto 4.3.

Senhor Presidente do Parlamento  
Senhor Primeiro Ministro  
Distintos Deputados  
Senhores Membros do Governo  
Rona na'in sira

Bankada CNRT nota katak Prezidente da República, Ema ida ultra-demokratiku tebe-tebes. Tamba Nia temi katak, atu hala'o prosesu hasai desizoens kona-ba OGE, presiza partisipasaun ema hotuhotu nian no tenki inklui ema hotuhotu. Bankada CNRT bele kompreende tendensia ultrademokratiku husi Prezidente da República, tamba Nia ba visita liu ona suku Atus tolu Hitunulu!

Se Estadu ida mak tenki atende nesidades husi suku ida-ida, Estadu né atu ba nebé lós?!? Sorti boot mak Presidente la visita aldeia ida-idak! Osan sei la to'o, atu fahe ba hotuhotu!

Bankada CNRT sei lembra katak, atu lori dezenvolvimentu ba suku no atu envolve comunidades sira, IV Governu hahú PDD no ikus mai sai PDID. Ohin lora, iha programa PNDS.

Atu fó lembra deit katak, iha inísiu prosesu ida ne'e, ho hanoin atu kapasita lideransa lokal hodi haré ba sira-nia prioridades rasik, IV Governu Konstitusional buka ajuda líderes lokais sira, oin-sá atu apresenta

prioridades. Número kiik liu nebé Governo simu, tempu nebá, mak prioridades Sanulu resin Rua, husi suku sira, to'o nia máximo maka prioridades Tolunulu resin Ualu.

Bancada CNRT bele hanoin katak assessores, husi Casa Civil no Casa Militar, kala simu prioridades sira né hotu, hodi hatudu ba Presidente da República hodi xama atensaun ba

Governo no Parlamento, kona-ba nesiedade atu rona ema hotu-hotu no ema hotuhotu tenki tama iha desizaun kona-ba OGE.

Presidente da República mós temi 'sustentabilidade' ba desenvolvimento rasik, hodi dehan katak ita nia rekursus atu hotu ona, ne duni tenki investe ba ema, la ós fali ba infraestrutura.

Atu hamenus desigualdade entre áreas rurais no urbanas, Bankada CNRT fo lembra ba rona-na'in sira hotu katak, durante tinan ida, husi 2012/2013, Timor-Leste kaer Chairmanship ka Prezidênsia ba UNESCAP. UNESCAP né, maka Komisaun Ekonómika no Sosial ba Asia no Pasifiku, ONU nian, iha Bangkok. Iha Bangkok, konkluziun nebé hasai, hodi buka finansiamentu, dehan katak Paises Asia no Pasifiku tenki aposta iha infra-estruturas básikas, atu halakon desigualdade entre rejioens iha país ida nia laran, no entre países iha Asia no Pasifiku.

Timor-Leste mós partisipa, iha tinan kotuk ba, iha Konferensia Boot, iha Adis Ababa (Eithiopia), organizadu husi ONU, kona-ba 'Financing for Development', nebé ko'alia liu kona ba infra-estruturas básikas iha Rai sira Menus Dezenvolidus, iha Mundu tomak.

Atu remata, Bankada CNRT hakarak fó hatene ba Rona-na'in sira tomak, katak:

Iha mensajem ba Parlamento Nasional, iha loron 28 Dezembro tinan kotuk, Presidente da República komunika nia 'veto' no husu atu halo 'apresiasaun dala ida fali' ba OJE 2016, ho fundamentus nebé apresenta hanesan 'kontributos Presidente da República nian ba elaborasaun Orsamentu Jeral Estadu nian ba 2016'.

Konstituisaun RDTL la atribui kala fó ba Presidente da República poder espesífiku atu intervém iha prosesu elaborasaun orsamentu nian.

Konstituisaun RDTL fó deit, ka eksklusivamente, poderes sira né ba Governo no Parlamentu Nasional.

Artigo 103º. Konstituisaun RDTL dehan nuné: 'kompete ba Governu kondusaun no ezekeusaun politika geral País nian', 'bain-hira hetan aprovasaun iha Parlamentu Nasional', tuir alínea a), no. 1, artigo 115º.

Alínea d), no. 1, artigo 115º. Konstituisaun RDTL nian, dehan explicitamente, katak klaru tebetebes, kompete ba Governu 'atu prepara Plano no Orsamentu Jeral Estadu nian, hodi ezekeuta, bain-hira hetan ona aprovasaun husi Parlamentu Nasional'.

Ne'e duni, Bankada CNRT hakarak deklarata katak, EZERSISIU BA VETO, husi Sua Excelencia Presidente da República, LA PERTINENTE!

Atu taka, Bankada CNRT afirma katak sei KONFIRMA NIA VOTOS NEBÉ HASAI TIHA ONA, iha debate Orsamentu Jeral do Estadu, iha loron 18, fulan Dezembro, tinan 2015!

Bankada CNRT mós hakarak expressa nia KONFIANSIA POLITIKA ba VI Governo Konstitusional, nebé lidera husi Primeiro-Ministro, Dr. Rui Maria de Araújo.

FIAR-AN, LA'O BA OIN!

MEHI HAMUTUK, MEHI POVU NIA MEHI!

Deputado Natalino dos Santos Nascimento - Presidente Bankada CNRT